

# Adwentny memory

W nastędnym memoryju zhońiće někotre zajimawostki kołowokoło adwenta a jeho symbolow. Po tym zo sće sej kartki wutřihali, móžeće jón na dwoje wašnje hrać: Ći, kotřiž njemóža hišće čitać, móža sej jednotliwe wobrazy dwójce wučisćeć a poriki ze samsnym motiwom tworić. Štóž móže hižo čitać, njech jednotliwym wobrazam wotpowědne prawe wujasnjenje přiřaduje.

*Wjele wjesela!*





### Swěckowy wobłuk

Najstarši swěckowy wobłuk pochadza z lěta 1740 z Rudnych hór. Přenje wobłuki mějachu křesćanske motiwy, pozdžišo přidružichu so na příklad motiwy hórnikow. Džensa su woně jara mnohostronse wuhotowane. Praji so, zo symbolizuja swěčki na wobłuku žedźbu hórnikow za swětłom dnja, dokelž te woni jich džěła w podkopakach dla njewidźachu. Nimo połkulojtych swěckowych wobłukow eksistuja tež třiróžkate.

### Fijałkojta barba

W adventnym času wužiwa so měšniske ryzwo, drasta ministrantow, wodžěće kelucha a něštožkuli druhe w fijałkojtej barbje. To je barba nakazanja. Zdobom symbolizuje přeměnenje a nowy započatk. Nimo adventneho časa noša duchowni fijałkojte ryzwo tež w póstnym času a w někotrych kónčinach na pohrjebach. Jako spowědnicy wužiwaja tohorunja fijałkojtu stolu.

### Adwentny wěnc

Adwentny wěnc je ewangelski farar Johann Hinrich Wichern wokoło lěta 1850 wunama-kał. Wón chcyše džěćom čas čakanja w adwenće wolózić. Spočatnje steješe na wěncu 24 swěckow, wjetšich a mjeńšich, za kóždy dzeń jedna. Pozdžišo jón pomjeńšichu a stajichu na njón jeniće hišće štyri swěčki, potajkim za kóždu adwentnu njedzelu jednu. Wěnc sam je bjez spočatka a kónca a znamjo wěčneho Boha, kiž je so w Jězusu Chrystusu hody sčłowječil.

### Wišnjowa hałužka

Na swjedženju swjateje Borbory 4. decembra staja sej mnozy wišnjowu hałužku we jstwe do wazy, zo by hody rozkčěła. Alternatiwnje móže to tež hałužka druheho sadowca abo forsicije być. Legenda powěda, zo je swjata Borbora po puću do jastwa na haľuzy wisajo wostała. Wona wza wottorhnjenu haľužku sobu a staji ju do wazy. Tón dzeń, jako dyr- bješe Borbora zemřěć, dokelž běše křesćanka, je haľuza rozkčěła.

### Swjaty Mikławš

Biskop Mikławš běše w 3. a 4. lětstotku w džensnišej Turkowskej žiwy. Jedna z mnohich legendow wo jeho wosobje powěda, kak je wón – w tym času njeběše hišće biskop – raz w nocy tři złote kule z woknom do domu ćisnył. W nim bydleše nan ze swojimi třomi džowkami. Tón běše jara chudy a njemóžeše je hižo zastarać. Mikławš je jim na te wašnje pomhał. Tohodla předstaja so wón hišće džensa mjez druhim z třomi złotymi kulemi abo pozłóčanymi jabłukami.

### Swjata Lucija

Mjeno „Lucija“ rěka přeložene „swěćaca so“. Žiwa běše Lucija w 3. lětstotku w Sicilskej, to je džensa džěl južneje Italskej. Tehdy buchu mnozy křesćenjo přesćěhani a so tuž chowachu. Lucija je jich z jědžu zastarowala. Wona staji sej wěnc ze swěčkow na hłowu, zo by ruce za nošenje jědže swobodnej měła. We wuměłstwje předstajeja swjatu Luciju na příklad z wolijowej lampu, swěčku, dołhim woblečenjom abo mječom w šiji.

### Jutnje

Jutnje su kemše w adwentnym času jara zahe rano. Wěriwi swjeća je w swětle swěčkow. Zdobom su to wosebite kemše na česć maćerje Božej. W mnohich kónčinach swjećachu je jeničce sobotu, druhdže wotydženja, w někotrych pak tež wšědnje.

### Adwentny kalender

W 19. lětstotku wótrěchu džěci na příklad wšědnje prosće z krydu namolowane smuhi ze sčěny abo položichu kóždy dzeń stwjelco słomy do žlobika, zo by Jězudžěcatko hody mjehko ležalo. Přěni šokolodžany adwentny kalender z woknješkami mějachu w 1930tych lětach w Drježdžanach.